



Inatsisartunut ilaasortaq Saxtorph Didriksen, Siumut  
/MAANI

### **Inuttalersuisarnek pillugu § 37-imi apeqquutigineqartumut akissuteqaatit**

Inatsisartut suleriaasianni § 37, imm. 1 naapertorlugu Naalakkersuisunut ikerinnarsiortunik aalisarnermut atatillugu inuttalersuisarnek pillugu apeqquuteqarsimavutit. Apeqquutigineqartoq uannut akisassanngortinneqarsimavoq.

#### **Apeqquut:**

Aviisi Sermiatsiaq-kut saqqummertukkut atuarneqarsinnaavoq Royal Greenland A/S-ip avaleraasartooniarnermi inuttaqarnermut nalunaarut unioqquittariaqarsimagaa, utoq-qatsissutigineqarluni misilittagalinnik nunatsinni pissarsisinnaannginneq. Inuttaqarnermut nalunaarummik unioqqutsitsineq Naalakkersuisut akueriinnarsinnaavaat?

#### **Akissuteqaat:**

Aallarniutigalugu soorunalimi Naalakkersuisut inuttalersuisarnermut nalunaarut imaluunniit maleruagassat allat eqquutsinneqartannginneri akuersaarnartingilaat. Ikerinnarsiortunik aalisarnek suli Kalaallit Nunaanni nutaajusorujussuavoq. Tamanna tunngavigalugu taakkunannga aalisarnermut Kalaallit Nunaanni pisariaqartumik inuit misilittagallit suli ikittuinnaapput.

Royal Greenland taamatullu aalisarnermi akuusut allat tusagassiorfitsigut misilissimavaat taama aalisarusuttunut attaveqarsinnaanissaq. Royal Greenland 2014-imi maajimi juunimilu TV aamma Sermiatsiaq aqutigalugit inuttassarsiorluni ussassaarinikuusimavoq. Tamatuma saniatigut aalisarnerup taassuma suliffissanik nutaanik pilersitsinnaanera tusagassiorfitsigut annertuumik sammineqarsimavoq. Naak taamatut iliuseqartoqaraluartoq taamaasiorsinnaasut ikittuinnaat qinnuteqaateqarsimapput, ikerinnarsiortunik aalisarnermi pisariaqartinneqartumik misilittagallit. Ingerlatseqatigiiffiit namminneq aalajangigassarivaat qinnuteqaateqartut nammineq aalisariutaatiminni aalisarsinnaanissaannut naleqquttuunersut nalilersuissallutik.

Aalisarsinnaanissamut akuersissutit tunniunneranni Naalakkersuisut piumasaqaatigisimavaat aqumiut aamma umiarsuarmi inuttat pillugit nunatsinneersunik atuneq aamma ilinniartitaaneq pillugu nalunaarusiortoqaqqaarnissaanik. Taamatut piumasaqaasiornerup tunuliaqutarivaa siunissami taamatut aalisarnissamut qulakkeerutaasumik aalisartunik misilittagaqarluartunik pigisaqalernissaq angorusullugu.

Aalisarnerup aallartinginnerani taamatut aalisarnermi ingerlatseqatigiiffinit arlalinnit ajornartorsiutigineqarsimavoq Kalaallit aalisariutaanni inuttalersuisarnek pillugu Namminersorlutik Oqartussat nalunaarutaanni nr. 13, 17. november 2011-imeersumi § 2, imm. 1-imit aamma § 3 imm. 1-imit eqquutsitsisinaaneq.

22-08-2014  
Suliap normua. 2014-102946  
All. nr. 1671192

Postboks 269  
3900 Nuuk  
Oqarasuaat (+299) 34 50 00  
Fax: (+299) 34 63 55  
E-mail: apnn@nanoq.gl  
www.naalakkersuisut.gl

Tamanna tunngavigalugu Naalakkersuisunut inassutigisimavara taamatut aalajangersakkanit immikkut akuersissutiginnittoqassasoq. Inassuteqaammut ilaatinneqarpoq immikkut akuerineqarnerup tunniunneqarsinnaaneranut ersarilluinnartumik naatsorsuutigineqassasoq, ingerlatseqatigiiffimmit immikkut akuerineqarsinnaanerup tunniunneqar-nissaa sioqqullugu ilinniartitsinissamut pilersaarutinik nassiussisoqarnissaa, taakku-nuuna takuneqarsinnaassalluni qanoq iliorluni siunissamut inuttanit ilinniartitsinerup qulakkeerneqarsinnaanera. Tamatuma kingunerissavaa Kalaallit Nunaanni pisariaqar-tinneqartumik misilittagaqarnerup pilersikkiartuaarneqarnissaa, taamaasilluni siunissami ingerlatseqatigiiffinit inuttalersuisarneq pillugu nalunaarut eqquutsinneqarsinnaalluni.

Inussiarnersumik inuulluaqqusillunga

Finn Karlsen